

春秋左傳釋人卷八

淺草文庫

河内范照藜乙青篋

諸侯臣考四

鄭臣考

公族



共叔段莊公母弟公以母武姜命封之京稱京城大叔後日

強橫謀襲鄭公伐之段出奔共

公子呂字子封初諫莊公寵段已而奉公命伐段於京

公子滑段子其父作亂被逐亦出奔衛 三人並見隱元年

曼伯 一稱檀伯亦公子隱五年與子死以制人敗燕桓瓦



三傳釋人 卷八 二十六

年為右拒以禦王十五年厲公殺之

子元

補正謂即厲公字甚是今從之蓋厲公名突字子元

傳或稱子元或稱公子突特互見耳隱五年曼伯子

元以奇兵敗燕即厲公見傳之始其後為三覆以敗

戎為二拒以禦王知兵善謀如出一手桓十五年因

櫟人殺檀伯而居櫟故昭十一年傳云鄭莊公城櫟

而置子元焉使昭公不立又云鄭京櫟寔殺曼伯是

明以子元為厲公矣杜氏妄註於昭十一年今特正

之其為君後出亾反國詳見諸侯世次茲不再贅

公孫闕字子都隱十一年與潁考叔爭車不勝而殺考叔

公孫獲隱十一年莊公使之處許西偏以監許

語

一稱子人厲公弟桓十四年盟魯

子儀子莊十四年傳瑕殺子儀及其二子名皆不傳

公子闕此又是一人非公孫闕也莊十六年厲公殺之

公父定叔共叔段孫當是公孫滑子莊十六年避禍奔衛三年

厲公召而復之以守共叔之祀

世子華文公大子公淫於叔父子儀妻陳嬀所生僖七年盟

甯母背父媚齊得罪於父十六年公殺之

公子士文公子江女所生僖二十年與洩堵寇帥師入滑後

為楚人所酖而死見宣三年

子臧 子華母弟僖二十四年奔宋文公使盜殺之

子人九子人氏九名語之後人僖二十八年文公使之行成

於晉

公子瑕文公子蘇女所生公惡之僖三十一年奔楚又二年

楚伐鄭將納之為外僕髡屯所殺

公子歸生字子家文二年會諸大夫伐秦宣二年敗宋師四年

與公子宋同弑靈公十年卒國人斲其棺而逐其族

公子龙文九年為楚所囚

子俞彌文公子公子瑕母弟早卒見宣三年程氏識小錄合

洩堵俞彌為一人大謬

公子宋字子公宣四年因不得食龜染指於鼎靈公怒欲殺

之遂與子家謀弑公

公子曼滿語王子伯廖欲為卿伯廖斷其無德而貪必亾果被

殺見宣六年

公子魚臣字僕叔宣十二年石制欲立之未果皆被殺

公孫黑肱字子張一稱伯張穆公孫宣十四年代子良於楚後

歸鄭襄十八年從君伐齊二十二年卒寢疾時召其

子段黜官薄祭盡歸餘邑且教以貴而能貧敬戒事

君嗚呼可謂賢矣

公孫申一稱叔申成四年疆許田敗焉九年晉執成公申謀

立君以拒晉十年鄭立大子髡頑晉歸成公公返國
討立君者遂殺叔申及其弟叔禽

叔禽 申弟同被殺

公子繻成十年公子班立之為君國人殺之

公子班字子如成十年立公子繻繻被殺班奔許十三年入

國殺子印子羽子駟帥國人攻而殺之並及其子弟

姪三人

子駟 班弟

孫叔 班子

孫知 駟子三人并與班同時被殺

公子鱄成十五年與諸大夫會吳於鍾離

子狐 已下四人皆群公子子駟弑僖公以瘡疾赴諸侯羣

公子謀殺子駟子駟先之襄八年四人皆被殺

子熙

子侯

子丁

孫擊

孫惡 二人皆子狐子父被殺俱出奔衛

段 公孫黑肱子襄二十二年其父疾召室老等立之

案此人並非字子石無氏無位其事跡亦不再見於

二十二年以後杜氏妄注遂致後人或以為是公孫段或又以為是印段乖謬之見種種不一甚矣善讀書者之難得也

宛射犬襄二十四年為晉人致楚師者御車晉人稱為公孫當亦公孫輩故入於此

公孫揮字子羽官行人一稱行人子羽一稱行人揮襄二十

四年聘晉博學多聞善為詞令鄭國賴之 案十一

穆中之子羽已於成十三年為公子班所殺杜注乃

以行人子羽與十一穆子羽合為一人大謬 四書

釋地云王崑繩常疑子羽稱公孫揮似亦當為某公

之孫余曰公孫揮能辨四國大夫之族姓而不能俾

已之族姓流傳於後亦一異也附記於此

公孫盱襄三十年伯有之亂為游吉入盟大夫者

公孫登昭十八年鄭火子產使徙大龜

十一穆

案宣四年傳靈公弒鄭人欲立子良子良以讓公子

堅堅立是為襄公公將去穆公諸子而舍子良子良

不可曰穆氏宜存則固願也若將亾之則亦皆亾去

疾何為乃舍之皆為大夫是時穆公諸子共十一人

日子良公子去疾日子罕公子喜日子駟公子駢曰

子國公子發曰子孔公子嘉曰子游公子偃曰子豐
 曰子印曰子羽曰子然曰士子孔穆氏之存皆子良
 一人為之其後子印子羽為公子班所殺子羽之子
 天死而不傳子然士子孔相繼早卒子孔相二室又
 以作亂亾其身以及二族故自簡公十二年而後
魯為
襄十六卿皆良罕駟國游豐印之子孫諸侯稱之曰
九年
 七穆

良氏

公子去疾字子良宣四年讓位於襄公且言於公舍穆氏以故
 羣公子皆為大夫十二年楚入鄭子良為質十四年
 國人懼晉使子張代之以謀國成二年與諸大夫會
 蜀七年相成公如晉拜師仁讓忠良賢名四達誠不
 媿穆氏領袖矣

公孫輒字子耳子良子襄八年與子國侵蔡時為司空十年
 與楚人侵魯又侵宋孟獻子斷其有災是年冬與子
 駟子國並為尉止等所殺非子良之肖子也

良霄

字伯有子耳子嗣父為卿襄十一年鄭服晉使霄往
 告於楚楚人執之越二年始歸十八年從伐齊二十
 六年會澶淵疆衛戚田二十七年會諸大夫盟宋晉
 趙武歸自宋過鄭簡公享之六卿皆從霄時為次卿

賦詩譏晉君臣而武不喻也後因使子皙如楚彼此相惡三十年子皙因其酗酒伐而焚之霄醉中出奔已而介甲以入國駟族攻而殺之藉非子產則霄死無葬地族且亾矣剛愎侈汰卒以殺身乃祖美德竟無以庇之也哀哉

良止

伯有子其父死為厲鬼以驚國人昭七年子產立止為大夫以撫之國始安止亦無事見長而族微矣

罕氏

公子喜字子罕成九年晉執成公十年子罕往賂晉而成公始得歸十四年伐許十五年侵楚十六年鄭又叛晉

即楚子罕伐宋是年晉敗楚鄭於鄢陵鄭猶未服襄二年成公卒僖公少子罕當國子豐欲愬於晉以廢公子罕不可後公卒為子駟所弑此子駟所以見殺於盜而子罕之子孫所以世有賢人而位上卿也

公孫舍之字子展子罕子嗣父為卿襄八年楚伐鄭與子駟論從晉楚其言甚正子駟不從其後數年屢被諸侯之師子駟輩遇害卒賴其謀服於晉國乃安襄十八年子孔召楚師襲鄭能預知其謀與子西完守備尤見禦變之材明年子孔見殺代之當國位為上卿執政十餘年碩德仁風望重四國晉趙武叔向諸賢人尤

為傾服襄二十九年卒子孫世為上卿以掌國政嗚呼豈不休哉

罕虎

字子皮子罕子襄二十九年嗣父為上卿即以父命餼國人粟明年駟良之亂子產將出亾子皮知其賢自止之是年冬遂授以政且帥公族以聽命子產執政而國大治皆子皮能用善人之力也昭十三年卒子產歸自平邱痛哭之

子蠶

名嬰齊子皮子嗣父為上卿昭十六年晉韓起聘鄭與六卿餞之於郊

罕達

字子姚一字子贖一稱武子贖子蠶子嗣父為上卿定十五年敗宋師于老邱是時晉伯已衰齊鄭盟鹹始叛盟主范中行出奔鄭與齊宋諸國救之哀二年子姚與子般至為之送粟而敗於鐵背大國輔叛臣蓋先大夫之德幾亾矣然以趙孟知伯之強而國不至大受其擾亦可謂能禦強敵者

公孫鉏子展弟襄三十年羽頡奔晉子皮使鉏為馬師以代之

之

罕朔

公孫鉏子嗣父為馬師故稱馬師氏昭七年殺罕魋奔晉晉人使為嬖大夫

罕魋

子皮弟為罕朔所殺

駟氏

公子駟字子駟成十年為質於晉而成公得歸襄二年成公卒僖公立子罕當國子駟為政未幾子罕卒代之當國弑僖公殺羣公子抗晉國奪民田強暴已甚襄十年為尉止等所殺凶人不終蓋早開其端云

公孫夏字子西子駟子父被殺聞之不做而出先臨尸而後追盜子產子蟜共助之卒殺眾賊嗣父為卿襄十八年子孔召楚師謀襲鄭子西助子展守國明年子孔誅位為次卿朝聘會盟周旋大國能以恪恭退讓蓋父愆可謂幹蠱之子矣

公孫黑字子皙亦子駟子子西弟襄十五年為質於宋其後攻殺伯有且與子南爭室昭二年將作亂子產數其罪逼之縊死凶人不終竟蹈乃父覆轍

駟帶

字子上子西子嗣父為卿襄三十年助子皙攻殺伯有游吉將亾子上追而返之昭元年因子皙與子南爭室六卿共盟子上與焉六年卒

駟偃

字子游子上子嗣父為卿昭十六年與諸卿共饒晉韓起賦詩十九年卒

絲

子游子晉大夫之甥也其父卒絲幼族人廢之而立其叔子瑕

駟乞 字子瑕子游弟昭十九年嗣兄為卿

駟欵 字子然子瑕子定八年嗣子大叔為政殺鄧析用其

竹刑君子譏之國政於是乎衰矣

駟宏 字子般子然子哀二年與罕達共送晉范氏粟敗於

鐵其後晉知伯伐鄭子般屢禦之可稱後勁矣

駟秦 駟氏族或曰亦子然子嬖大夫哀五年國人惡其僭

分殺之

印 子皙子昭二年子皙臨死請以印為楮師子產不從

國氏

公子發字子國成五年為楚所執襄二年成公卒為司馬五

年聘魯八年侵蔡從楚背晉與子駟同黨十年竟與

子駟子耳同被尉止等所殺有媿童子多矣

公孫僑字子產一字子美子國子襄八年論侵蔡其父怒其

多言而言皆驗十年其父遇害率兵車殺賊勸子孔

焚載書以安眾見事之明定變之略已露端倪十九

年子孔誅始為卿三十年子皮授之以政當國二十

餘年昭二十年卒考其生平事大睦鄰敬君愛民用

人行政美不勝書列邦賢人如季札叔向晏嬰無不

傾倒孔子稱之曰有君子之道曰惠人曰古之遺愛

春秋二百四十年名卿中一人而已若夫作邱賦鑄

刑書皆出於治國救世之苦心豈可以一時人言少之哉

國參

字子思諡曰桓一稱桓子思子產子嗣父為卿昭三十二年會諸大夫城成周哀七年憂宋圍曹救之二十七年尚有告急齊師語距其父卒時已五十五年蓋七十餘歲矣卒在春秋後案十一穆中以諡傳者惟罕達國參二人大事表以桓子思為駟宏謬甚

孔氏

公子嘉字子孔一稱司徒孔襄八年楚伐鄭欲待晉見與子駟殊時為司徒及子駟三人遇害遂當國專政八年其後欲去諸大夫且召楚師賴子展子西守國破其謀襄十九年諸卿共殺之而分其室

公孫洩子孔子其父被殺洩久廢昭七年子產立為大夫僅

以守祀而已

孔張

洩子昭十六年晉韓起聘鄭張後至失位為客所笑

游氏

公子偃字子游成三年帥師禦諸侯之師六年相成公如晉拜成

公孫董字子矯子游子襄八年楚師伐鄭欲待晉見與子展

同十年子駟等被殺子矯率國人助子西子產攻盜

以靖國十四年會伐秦時為司馬勸諸侯進師晉大夫善之十九年卒晉平公請於天王賜之大路以葬亦穆氏所未有也

游暇 字子明子嶠長子嗣父為卿襄二十二年奪人之妻為其夫所殺

良 子明子子展因其父失德廢之

游吉 一稱子大叔子明弟子展立之為卿昭二十年繼子產為政定四年卒距其為卿時已四十六年矣生平爾雅溫文善為詞令以事大國屢奔走晉楚之廷無失禮無失言蓋受子產之教者深而又能謹慎以出之者也噫賢矣哉

公孫楚字子南亦子游子夔大夫昭元年子皙與之爭室子南傷之以戈子產放之於吳

游速 子大叔子定六年帥師滅許 案世族譜以游速為渾罕合為一人大謬詳後渾罕注

豐氏

子豐 名失傳亦未為卿襄七年傳文有欲廢僖公之意子罕止之

公孫段字子石一稱伯石子豐子襄二十七年從簡公享趙孟賦詩三十年子產立之為卿昭二年相簡公如晉

晉君賜之州田七年卒子產歸州田於晉

豐卷

字子張豐氏族襄三十年子皮為其欲攻子產逐之
奔晉三年子產復之

豐施

字子旗伯石子嗣父為卿昭十六年與諸卿餞晉韓
起賦詩克紹父風焉

印氏

子印

名失傳成十三年為公子班所殺

印段

字子石子印子與公孫段同名同字故稱印段以別
之又稱二子石襄二十七年同諸子從君享趙孟時
已為卿二十九年如周葬靈王三十年駟良之亂子
產將出亾子石義而從之及子皮止子產子石亦返

蓋亦人所難能宜趙孟聞其賦詩而美之也

印癸

字子柳子石子嗣父為卿昭十六年與諸卿賦詩餞
晉韓起

印堇父印氏族襄二十六年楚伐鄭獲之獻於秦鄭人取貨

於印氏而贖之

羽氏

子羽

名失傳成十三年為公子班所殺

羽頡

子羽孫其父早死名不傳為馬師故稱馬師頡黨於
伯有襄三十年奔晉為任大夫

然氏

子然 名失傳子孔同母弟成十年與晉盟而成公得歸襄

元年侵宋六年卒

然丹 字子革子然子襄十九年因子孔之難出奔楚後仕

楚為右尹

然明 一稱謨茂一稱謨明襄二十四年常論晉程鄭將死

言果驗子產賢之從而問政後論鄉校亦大服子產

賢名聞於諸侯洵無媿也 案此人或亦子然之後

今從世族譜附錄於此

士氏

士子孔名失傳與公子嘉同字故稱士子孔以別之襄八年

卒其事不見於傳

子良 名失傳士子孔子黨於子孔襄十九年子孔誅出奔

楚

洩氏

已下諸族皆未詳所自

洩駕 一稱洩伯隱五年伐燕七年論陳五父

洩堵寇 一稱洩堵俞彌僖二十年與公子士同入滑者 案

僖二十四年之洩堵俞彌即二十年之洩堵寇傳文

顯然杜氏前注甚明後注乃以洩字連公子士為句

而以堵俞彌另為一人已誤矣世族譜竟列於堵氏中程本又以為即宣三年傳之子俞彌則更謬矣今特為改正以質之善讀左氏者

洩駕 惡公子瑕見僖三十一年距隱五年已九十年當又是一人

高氏

高渠彌 一稱高伯桓五年禦王與原繁同將中軍十七年弑昭公立子亶明年齊人以車裂之

高克 閔二年師潰奔陳

堵氏

堵叔 與叔詹師叔齊管仲稱為三良見僖七年

堵女父 因子駟奪其田遂與尉止等作亂殺子駟子國子耳子產等攻之女父奔宋鄭人賂宋歸而殺之見襄十年

堵狗 女父族襄十五年鄭人奪其妻歸諸晉范氏

皇氏

皇武子 名失傳僖二十四年文公問禮以享宋公三十三年辭秦成

皇戌 宣十二年如晉師致詞成五年鄭許訟於楚鄭伯不勝楚執戌及子國

皇辰 成十八年從楚子辛伐宋彭城

皇耳 成子襄十年侵衛被獲

皇頡 襄二十六年成城麋為楚穿封成所囚

石氏

石癸 字甲父僖二十四年與孔侯二人視天王於汜三十

年與侯宣多逆公子蘭於晉以為大子 案甲父是

石癸之字本是一人傳或稱石甲父或稱石癸特互

見耳以僖三十年傳文與宣三年傳文合觀之尤為

顯而易見杜氏未注後人竟分為二人謬矣今正之

石楚 文十七年從晉荀林父等討宋

石制 一稱子服宣十二年欲立公子魚臣被殺

石首 成十六年鄆陵之邑為成公御戎

石奭 一稱石孟官大宰襄十一年從伯有使楚被執十三

年始得歸

侯氏

侯宣多 僖二十四年與孔將鉏石甲父視天王於汜三十年

又與石甲父逆公子蘭於晉以為大子文二年以立

穆公故恃寵作亂被誅見文十七年

侯羽 成七年與共仲攻楚師

侯孺 成十七年隨大子髡頑為質於楚

三傳釋義 卷八 七 如不及

左傳卷八

侯晉 襄十年與尉止等作亂殺子駟三卿及尉止被殺晉
奔晉堵女父等奔宋其後鄭人納賂於宋求堵女父
等誅之獨不聞求晉於晉豈以晉大國而畏之與抑
亦晉有先見之明耶

王子氏

王子伯廖譏公子曼滿無德而貪見宣六年

王子伯駟襄八年鄭服楚使之告晉十一年晉悼公三駕使之
行成

尉氏

尉止 因子駟黜其車遂與司臣等作亂襄十年殺子駟三

卿子產攻之止與子師僕被殺堵女父四人奔宋其
後鄭人賂宋宋子罕因司臣賢送諸魯以堵女父尉
駟司齊三人歸鄭鄭人皆醢之

尉駟 尉止子

司氏

司臣 詳見尉止注

司齊 司臣子

諸大夫

尹氏 魯隱公為公子時鄭人囚之尹氏後與尹氏俱歸魯
見隱十一年其人在春秋前故首列之

三傳釋文

左

如不及齊

祭仲 祭地名仲字為祭封人有寵於莊公使為卿一稱祭足一稱祭仲足隱元年諫莊公寵叔段三年帥師取周之麥禾桓十一年莊公卒仲立昭公宋人執仲使立厲公仲從之昭公奔衛十年厲公惡其專使雍糾殺之仲先殺糾厲公奔蔡仲復迎昭公十七年昭公被弑子亶立明年齊殺子亶仲又立子儀既不能善事厲公於前復不能保全昭公於後奸猾專橫雖其賦性不良亦熏染於莊公之身教者久也

穎考叔 穎谷封人隱元年感化莊公復迎其母左氏以純孝稱之十一年伐許與子都爭車被殺孝子固如是耶

原繁 隱五年伐燕桓五年禦王為中軍莊十四年厲公復國逼之縊死

良佐 隱七年如陳莅盟

宛 未賜族隱八年歸祊於魯

祝聃 隱九年敗戎桓五年射王中肩罪通於天矣

瑕叔盈 隱十一年圍許以螿弧登城

雍糾 祭仲壻桓十五年厲公與之謀殺仲糾妻告仲仲殺糾公載其尸奔蔡

周氏 周姓之大夫名不傳桓十五年祭仲殺雍糾尸諸周氏之汪汪池也昭二年子皙縊尸諸周氏之衢衢衢

道也皆地之以周氏得名者類記於此後不更贅

傅瑕 莊十四年弑子儀納厲公公入殺之

強鉏 祭仲黨莊十六年厲公治雍糾之亂刑其足

鄭詹 卽叔詹莊十七年齊人執之既而逃歸僖七年齊管

仲合堵叔師叔共稱爲三良其後論楚成不終諫文

公慢晉公子無愧執政之良臣矣

聃伯 僖二年爲楚所囚

孔叔 僖三年諫文公背齊五年諫逃盟七年又請下齊可

謂忠於謀國者矣

申侯 本楚人楚文死奔鄭有寵於厲公僖四年齊侯賜之

虎牢陳轅濤塗勸其城而譖之七年爲文公所殺

師叔 詳見叔詹

孔將鉏僖二十四年與石侯二人同視天王於汜

佚之狐僖三十年晉秦圍鄭薦燭之武以退敵

燭之武說秦伯退師詞令之善千古稱之

樂耳 文九年楚伐鄭與公子堅等俱被囚

執訊 通訊問之官姓名不傳見文十七年

共仲 成七年與侯羽同軍楚師

伯蠲 成九年行成於晉被殺

姚句耳成十六年如楚告急

唐苟

成十六年為成公戎右

門子

卿之適子見襄九年 案門子非一人見傳亦非一

次其名皆不傳姑附錄之

子師僕襄十年因喪田助尉止作亂被殺

裨竈

襄二十八年論周王與楚康皆將死三十年論伯有

將亾昭十年又決晉侯將死十七年又預知四國將

火請子產禳之子產不從其語亦不盡驗甚矣術士

之難知天道也

裨諶

襄二十九年論政將歸子產三十二年傳稱其善謀孔

子亦稱之

僕展

伯有黨從之死見襄三十年

樂成

襄三十年羽頡奔晉因之以事趙文子先是雞澤之

會成奔楚適晉在襄三年

大史

名不傳襄三十年子產使命伯石為卿

馮簡子名不傳襄三十一年與子大叔遊客傳稱其能斷大

事 案鄭大夫皆無諡七穆中有諡者二人一國參

諡桓稱桓子思一罕達諡武稱武子贍此外有諡者

二人一皇武子一馮簡子而其名皆不傳殊不可解

徐吾犯其妹美子皙與子南爭娶之見昭元年

渾罕 字子寬昭四年論子產作邱賦十八年火政又見使

案世族譜以游速為渾罕而程本遂列之一人三稱謬矣游速為游吉子父沒始見傳在定六年上距昭四年計三十六年當在童穉焉得與聞國政而妄譏正卿乎渾罕子寬自是一人若謂即游速是不知左公紀事體裁而細玩前後傳文也不可以不辨

司墓

掌公墓大夫姓名不傳見昭十二年

富子

因孔張失禮恐得罪於晉諫子產

屠擊

祝欸

豎柎

鄭旱使三人祭桑山因其斬木不雨皆奪其官邑

已上四人皆見昭十六年

里析

昭十八年預以火災告子產及災里析死子產使遷

其柩

子上

火政與子寬巡羣攝屏 案此另是一人非駟帶也

駟帶字子上昭六年已卒

祝史

名不傳火政徒主禘

商成公

火政倣司宮 已上三人並見昭十八年

鄧析

定九年為駟歛所殺

樂官

師悝

左傳卷八

卷八

三

知不及齋

左傳釋義 卷八

師觸

師觸 三人皆襄十一年賂晉者

師蒺

師蒺 二人皆襄十五年賂宋者已而慧諷宋子罕歸之

小臣

外僕髡屯屯名外僕之髡髮者禽公子瑕見僖三十三年

外僕 名不傳掌次舍者襄二十八年諫子產如楚不為壇

尹何 子皮欲使之為邑大夫子產諫而止之見襄三十一年

年

府人

庫人

司宮 寺人之屬

野司寇縣士

郊人 已上五項並見昭十八年火政名姓不傳姑類記之

許瑕 武子賸嬖人為之取邑於宋而敗師焉

邾張

鄭羅 武子賸敗師二人皆被宋獲 已上三人皆見哀九年

年

商賈

弦高 僖三十三年遇秦孟明將襲鄭以牛犒師馳告於國

左傳釋義 卷八 三

鄭賴以安權略過人不圖於商賈遇之

賈人

名不傳晉荀罃在楚欲救之以出未果後罃歸晉善

視之賈人辭而之齊何鄭賈之多賢也見成三年

商人

名不傳晉韓起聘鄭欲買其玉環子產拒之見昭十

六年

宋臣考

公族

公子穀甥案文十一年傳云宋武公之世鄭瞞伐宋司徒皇父

禦之彫班御皇父充石公子穀甥為右司寇牛父駟

乘以敗狄皇父之二子死焉宋公以門賞彫班使食

其征云云杜注皇父戴公子名充石又云皇父與其

子穀甥牛父皆死故彫班獨受賞是因皇父之二子

死焉句遂謂穀甥牛父皆是皇父子謬矣皇父是戴

公子其子不得復稱公子且皇父為司徒其子又何

得同時為司寇耶陳氏世族譜駁之良是愚謂穀甥

自是某公公子彤班牛父自是卿大夫其人皆在春秋前故列穀甥於公族之首列牛父與彤班於諸大夫之首似為得之或曰皇父之二子死焉之字是與字之訛其說近是附記於此以質學者

子游 莊十二年南宮萬弑閔公立子游為國人所殺

公孫固莊公孫為大司馬僖二十二年諫襄公戰楚二十七年如晉告急文七年為穆襄之族所殺

公子成莊公子文二年會諸大夫伐秦七年為右師

公孫鄭亦莊公孫文七年被殺

公子邛昭公弟文七年樂豫以司馬讓之八年襄夫人王姬殺之握節而死經稱司馬

孔叔 襄公孫

公孫鍾離亦襄公孫二人皆昭公黨文八年同為襄夫人所殺

公子朝莊公子文十六年為司寇十八年卒

母弟須文公母弟文十六年文公篡位使須為司城十八年武氏之族欲奉之作亂文公殺之

昭公子名不傳文十八年武氏之族欲道之作亂文公殺之

公子肥文公子成十五年為蕩澤所殺 文公弑兄篡位殺弟與姪而其子亦屢被殺天道好還吁可畏哉

太子痤平公太子襄二十六年伊戾向戌共譖之為公所殺

公子寅

公子御戎

公子朱

公子固

公孫援

公孫丁已上六人皆元公黨昭二十年為華亥所殺

母弟辰與地皆元公子景公弟也昭二十年與景公皆質於

華氏幾為所殺定十年景公寵向魋辰與地相繼奔

陳明年入蕭以叛 案辰與地皆景公弟定十年經

傳皆可考杜氏以為元公弟大謬

公子地母弟辰兄定十年傳文可據 案辰稱母弟地稱公

子傳文互見耳細心讀之世次井然何得妄注

公子城平公子昭二十年避華向之亂城與忌等奔鄭又適

晉明年以晉師救宋大敗華氏以安公室

公孫忌昭二十年奔鄭已而復入與城共滅華向二十二年

元公立之為大司馬

邊邛 平公會孫昭二十二年元公使為大司徒

元公之孫失名哀十二年向巢取錫殺之 案此當是辰與地

之子

公孫周元公孫景公取其二子得與啟養於宮未定所立哀

二十六年公卒大尹立啟六卿不服大尹以啟奔楚
共立得是為昭公

得 周長子

啟 得弟

公族諸氏

案武公之後曰武族穆公之後曰穆族其人名字無
一見傳文十八年文公以母弟須之難盡攻而出之
此外戴公之後四族曰華氏曰樂氏曰皇氏曰老氏
莊公之後一族曰仲氏桓公之後四族曰魚氏曰蕩
氏曰鱗氏曰向氏文公之後一族曰靈氏共公之後
一族曰褚師氏今依諸公世次序而列之於左

華氏

華父督戴公孫官大宰一稱大宰督桓二年殺孔父娶其妻
殤公怒之遂弑公莊十二年為南宮萬所殺

華御事督孫文七年為司寇十年論楚事

華耦 字子伯督曾孫官司馬文九年救鄭十五年盟魯經
書司馬華孫以貴之十六年卒

華元 御事子文十六年為右師宣二年被鄭獲國人贖而
歸之十五年如楚師與子反盟質於楚後復歸成十
五年以不能討蕩澤奔晉魚石止而返之歸殺蕩澤

以安公室襄元年會諸大夫圍彭城二年再會戚城
虎牢以偪鄭未幾卒當國四十年老成持重名聞諸
侯誠賢大夫也

華椒

耦子宣十二年救蕭又與諸大夫同盟清邱

華喜

椒子成十五年為司徒十八年圍彭城

華弱

椒孫當是喜子為司馬襄六年平公逐之奔魯

華閱

元長子代父為右師襄九年火政討右官十四年會
諸大夫伐秦冬又會戚十七年卒

華臣

閱弟為司徒閱卒臣弱其子臯比之室且殺其宰平
公欲逐之未果臣懼而奔陳見襄十七年

華臯比閱子見襄十七年

華定

椒孫為司徒襄二十九年會諸大夫城杞昭十年如
晉會葬十二年聘魯不能答詩叔孫昭子決其將
二十年與元公相惡公攻之奔陳二十一年與向寧
華亥復入國作亂二十二年皆出奔楚

華合比為右師昭六年寺人柳譖於平公公逐之奔衛 案

合比即是臯比臯比為元之孫閱之子閱既代父為
右師則閱死臯比亦代之為右師况其叔華臣已
元有大功於宋何得閱死臣匹而其孫不為卿耶徒
以傳無明文杜氏亦未之注致令讀者尙論不無遺

憾或曰合比或是臯比弟然總當直斷其為元之孫與閱之子

華亥

合比弟昭六年助寺人柳謀逐其兄代之為右師九年與諸大夫會楚子於陳十一年又會諸大夫謀救蔡二十年與元公相惡偽疾以誘羣公子殺公子寅六人取大子兄弟三人為質公亦質其子與華定向寧之子已而公殺其質以攻之亥與定寧同奔陳明年皆入南里以叛二十二年諸侯之師共圍之與定寧華登等皆奔楚而族亾矣

無感

亥子元公取之與寧子羅定子啟為質者已而皆殺之而攻華氏

啟

定子

華輕

亥庶兄為少司寇亥出奔時以三公子屬之送諸公已而將行公復其位明年華向入國輕與諸卿禦之

華費遂

昭四年從楚子伐吳後為大司馬昭二十年華定華亥作亂遂頗能自立明年其子自相殘害華驅劫之以叛而召定等卒之不能勝君舉族奔楚而華氏以亾即司馬亦不能自主也哀哉

華驅

字子皮費遂長子為少司馬昭二十一年殺弟劫父以叛且召定等入國作亂明年皆奔楚

如不及齋

如不及齋

如不及齋

如不及齋

華多僚費遂次子為公御士昭二十一年譖其兄貙於公而逐之未果為貙家臣張匄等所殺

華登 費遂少子黨於亥等昭二十年奔吳明年以吳師救

華氏與公戰不勝復如楚乞師卒不勝諸侯之師二十二年與其兄貙從定亥等皆奔楚華氏由是遂匹

華妊 華氏族居公里者

華豹 亦華族呂封人助亂為公子城所殺 二人並見昭二十一年

樂氏

樂豫 戴公元孫為司馬文七年諫昭公逐羣公子不聽既

而羣公子攻公六卿和之豫以官讓公子印國乃安

樂呂 文十八年為司寇宣二年死於大棘之戰

樂嬰齊 宣十五年告急於晉

樂舉 成二年文公卒始厚葬僭王禮傳曰君子謂華元樂舉於是乎不臣世次官職皆無考然與華元並稱當

亦六卿之長

樂裔 成十五年代向為人為大司寇

樂懼 戴公六世孫成十六年為鄭所獲

將鉏 樂族同被鄭獲

樂轡 字子蕩襄六年以弓楛華弱平公惡之弱出奔亦逐

子蕩

樂喜 字子罕為司城襄六年逐子蕩九年以司城為政救火災十五年歸鄭樂官以贖過二十七年論向戌弭兵之失具有卓見二十九年宋飢以粟貸民施而不德執政二十餘年敬君愛民有古大臣風度其子孫世執國政相其君以宋升降叔向之言猶信

樂造 為司寇火政庇刑器見襄九年

樂舍 喜孫元公黨昭二十年奔鄭

樂大心 昭二十一年為公禦華向有功明年華向皆亾立為右師居桐門故稱桐門右師二十五年會黃父定九年樂溷譖之奔曹十一年入蕭從公子地等以叛

樂祁 字子梁一稱樂祁犁亦喜孫昭二十二年立為司城二十七年會扈定六年如晉士鞅譖而執之八年卒於晉

樂輓 亦喜孫昭二十二年立為大司寇

樂溷 字子明祁子其父如晉知不免見溷於君而行後其父卒於晉遂嗣父為司城

樂髡 哀三年伐曹

樂茂 字子潞溷子嗣父為司城哀二十六年謀逐大尹以安公室其功最大位上卿以執政宜哉

樂朱釗輓子嗣父為大司寇哀二十六年助莒攻大尹

樂得 樂族為門尹哀二十六年大尹作亂六卿共謀逐之

樂皇兩族欲伐公得諫而止否則為晉范中行氏之

續矣

皇氏

皇父充石戴公子在春秋前見文十一年詳公子穀甥注

皇邠 充石裔孫襄九年從晉師伐鄭

皇國父為大宰襄十七年為平公築臺召誘

皇奄傷華氏黨昭二十二年奔楚

皇瑗 或曰充石八世孫為右師哀七年侵鄭十七年景公

執其子瑗奔晉召而復之明年為國人所殺

皇野 字子仲為司馬哀十四年與公謀誘向巢使攻魍以

安公室後怒麋立嫡之言譖於公見十七年

麋 瑗子奪兄邑以與其友哀十七年野譖於景公被執

鄭般 麋兄麋奪其邑愠而行

皇非我野庶子野廢其兄立之嗣父為大司馬哀二十六年

與緩懷等共助樂棧逐大尹以靖國

伯 失名非我兄被廢

皇緩 瑗從子哀十八年景公立為右師

皇懷 非我從弟哀二十六年為司徒 案皇氏在宋春秋

已來見傳者甚少乃至瑗為右師而後人材日盛哀之末年三皇並居六卿之位而魚仲華向諸大族無一存焉讀者於此感增今昔矣然三人能同心聽政助正除姦以安公室而族滋興焉固非向者諸叛臣之所敢望也

老氏

老佐 戴公五世孫成十五年代蕩澤為司馬十八年圍彭城卒

仲氏

公孫師莊公孫文十八年文公使為司城成十五年華元使以國人攻殺蕩澤時在卿位已三十餘年

仲江

師子襄十四年會伐秦

仲幾

江孫昭二十二年代向寧為左師三十二年會諸大夫城成周定元年為晉所執

仲佗

幾子定十年從母弟辰奔陳明年皆入於蕭以叛而族亾矣

魚氏

公子目夷字子魚桓公子襄公庶兄僖八年襄公請立之固辭襄公立使為左師後屢諫公圖伯公不聽卒以致敗公孫友目夷子嗣父為左師見文七年

魚石 友孫為左師成十五年止華元使討蕩澤既而與向

為人鱗朱向需魚府皆奔楚十八年楚納之入於彭

城以叛襄元年諸侯之師圍彭城晉人取之以歸

魚府 石弟為少宰從石出奔

蕩氏

公子蕩桓公子為司城見文七年一稱司城蕩

公孫壽公子蕩子其父卒辭司城使其子為之其子竟死於

昭公之難後至成八年猶如魯納幣蓋已有年矣

蕩意諸壽長子其父辭司城意諸嗣職文八年襄夫人初作

亂殺諸卿意諸奔魯魯人以其賢十一年言於宋而

復之十六年襄夫人再作亂與公子鮑弒昭公意諸

死之

蕩虺 意諸弟文十六年文公立使為司馬

蕩澤 字子山意諸子共公時嗣其叔虺為司馬成十五年

殺公子肥華元討而誅之其族由是亾矣真乃父之

罪人也

鱗氏

鱗矐 桓公孫文七年為司徒

鱗朱 矐孫共公時為少師寇成十五年黨於魚石同出奔

而族亾矣

向氏

一稱桓氏

向為人桓公孫成五年共公使之辭會十五年為大司寇與

魚石同出奔楚

向箒

為大宰亦同出奔或曰為人之弟存叅

向戌

桓公會孫一稱合左師成十五年二向亾華元立之為左師襄九年子罕火政使戌討左官十年晉人滅偃陽欲封之戌固辭以子平公十一年從晉伐鄭十五年聘魯尤孟獻子之室十七年諫平公逐華臣二十六年與寺人伊戾譖殺世子痤二十七年以弭兵

為名合晉趙武楚屈建及諸大夫盟於宋昭元年再會晉楚諸大夫於虢四年申之會獻禮於楚靈王六年華亥謀代兄右師戌論其必亾案向戌素有賢名朝聘會盟出使四國者四十餘年晉人欲以偃陽封之春秋已來未之有也然畏世子痤竟譖之死欺君甚矣若夫弭晉楚之兵以為名而求賞紊中外之防繁小邦之賦尤為千古之罪人也

向寧

戌子嗣父為左師昭十九年請師伐邾為邾子復仇後與元公相惡昭二十年公殺其子攻之與華亥華定皆奔陳明年同華氏復入為亂不勝二十二年皆

奔楚

向勝

向行

向羅

向宜

向巢

向鄭

向魋

二人皆向族元公黨為華氏所拘
寧子與華氏二子質於元公公並殺之
字子祿亦戍子黨於元公與向鄭皆奔鄭既而復入
助公子城大敗華氏以安公室
亦戍子 右五人並見昭二十年
戍曾孫為左師定九年逆樂祁之喪於晉哀十二年
伐鄭殺元公之孫于錫十四年其弟魋將作亂景公
誘巢使攻之魋奔衛巢亦奔魯

魋弟為司馬一稱桓魋景公嬖之定十年致兩公子
出奔諸卿從之大為國患哀十四年竟謀公公使其
兄攻之魋奔衛而向氏亡矣

子頎

子車

司馬牛

二人皆魋弟
亦魋弟孔子弟子魋作亂牛致邑適齊及魋之齊牛
避之適吳吳人惡之而反齊晉權臣皆召之不往適
魯而卒惡人作亂賢者無歸悲夫 三人並見哀十
四年

靈氏

公子圍龜字子靈文公子為質於楚而歸欲攻華氏成五年共公殺之

靈不緩子靈裔孫哀二十六年為左師與樂皇兩族共逐大

尹

褚師氏

褚師段字子石共公子襄二十年魯季武子聘宋段往逆之

石彊 段子定十年從母弟辰等出奔明年從之入蕭以叛

褚師子肥宋伐曹師還子肥殿見哀八年 案此人當是段後

諸大夫

彫班

司寇牛父二人皆詳前公子穀甥注

孔父嘉正考父子孔子六世祖也為大司馬隱三年穆公屬

其立殤公桓二年為華父督所殺

雍氏 以女妻鄭莊公生厲公桓十一年言於宋莊公誘執

鄭祭仲而立厲公

南宮萬 一稱宋萬一稱南宮萬莊十年為魯獲既而歸之十

二年作亂弒閔公奔陳宋人取而殺之

仇牧 為長萬所殺

南宮牛萬子從父作亂國人殺之

猛獲 萬黨助亂奔衛衛人歸而殺之

蕭叔大心蕭邑大夫大心名長萬作亂大心帥五公之族殺牛
與子游平亂而立桓公公因其有功遂封之蕭以為
附庸 案叔字大心名杜氏以叔為其名則大心二
字將何屬乎其後莊二十三年朝魯經書蕭叔正與
邾稱儀父同義杜氏安注貽悞後人不淺

門尹般僖二十八年如晉告急

狂狡 宣二年為鄭所獲

西鉏吾成十八年論楚納魚石襄九年火政庇府守時為大

宰

伯氏 名不傳火政見襄九年

莊朝 襄十七年伐陳獲司徒邛

芮司徒平公妾棄之父元公外祖父也見襄二十六年

戴惡 昭八年會楚師滅陳

司馬疆昭二十年華向之亂與公子城等奔鄭

豐愆 與樂大心等禦華向

厨人濮厨邑大夫為公定謀大敗華氏真智勇皆備之人

翟僕新助公與華氏戰居於新里

莊董 為公子城戎右 已上四人皆見昭二十一年

省臧

士平 二人皆華黨昭二十二年從華向等奔楚

成謹

郟延

哀十三年二人皆被鄭獲

大尹

失名哀二十六年景公卒專政立啟六卿共攻之以

啟奔楚

祝襄

祝官襄名大尹使襄私為載書襄以告皇非我

諸小臣

門官

守門者僖二十二年襄公敗於泏門官殲焉

帥甸

郊甸之帥文十六年襄夫人使之攻昭公而弑之

羊斟

字叔牂宣二年御華元如鄭師致元被獲元歸斟奔

魯

役人

築城者譏華元見宣二年

隧正

縣隧之官

校正

主馬

工正

主車

司宮

奄臣

巷伯

寺人

祝

大祝

宗

宗人 已上八項皆無人名竝見襄九年 祝宗皆

非小臣以傳無名類載於此

惠牆伊戾惠牆氏伊戾名寺人襄二十六年譖殺大子痤已而

平公烹之 伊戾固應烹顧獨烹一伊戾何耶

圉人 卽步馬者向戌譏夫人圉人以告見襄二十六年

寺人柳昭六年譖逐華合比元公爲大子惡之及平公之喪

柳媚之又有寵

蘧富獵公子地嬖臣見定十年

迹人 主迹禽獸者見哀十四年

諸大夫家臣

華吳 華閱宰襄十七年華臣使賊殺之

宜僚 華費遂侍人

張句 已下四人皆華龜臣張句三人與龜同殺多僚劫司

馬以叛後句與犢皆爲公子城所殺

臼任 案昭二十一年傳云子皮將見司馬而行則遇多僚

御司馬而朝張句不勝其怒遂與子皮臼任鄭翩殺

多僚劫司馬以叛而召亾人傳文甚明且杜注任翩

亦龜家臣乃經學辨體以臼字爲臼字將傳文改爲

遂與子皮曰 句任鄭翩 句殺多僚全不知文義之不

通最爲可笑

鄭翩

干犢 右五人並見昭二十一年

陳寅 樂祁宰定六年祁如晉勸其立子祁被執晉士鞅欲

如不及齋

卷八


卷八

其子代志寧不可而其言皆驗真賢臣也

子儀克向魑臣不與魑同作亂魑臣猶在宋見哀十七年

田丙 皇麋友麋奪兄邑以與之見哀十七年 案此人非

皇氏臣附記之



天保中

